

選舉典第四十四卷

徵聘部總論

易經 賁卦

六五賁于丘園束帛戔戔吝終吉

大朱子曰舊說指上九作高尙隱于丘園之賢而用束帛之禮

聘召之此說似近 雲峯胡氏曰諸家多言賁于丘園之賢本義謂不賁于市朝而賁于丘園敦本也束帛戔戔尙實也

禮記 儒行

儒有席上之珍以待聘夙夜強學以待問懷忠信以待舉

集說藍田呂氏曰古之君子三月無君則

弔及其進也不由其道不仕也非其招不往也蓋知所謂自治然後可以治人知所以自貴然後貴於物君子之用於天下有待而不與求焉其學也足以爲天下用非志於用而後學焉此所以待賁而沽也

明湛若水聖學格物通 舉措

桓帝延熹二年尙書令陳蕃上疏薦五處士豫章徐穉彭城姜肱汝南袁閎京兆韋著潁川李曇帝
悉以安車元纁備禮徵之皆不至蕃性方峻不接賓客唯穉來特設一榻去則懸之帝又徵安陽魏
桓其鄉人勸之行桓曰夫干祿求進所以行其志也今後宮千數其可損乎廐馬萬匹其可減乎左
右權豪其可去乎皆對曰不可桓乃慨然歎曰使桓生行死歸於諸子何有哉遂隱身不出 臣若
水通曰徐穉姜肱袁閎韋著李曇皆一世之名賢也陳蕃舉之可謂薦賢爲國矣而皆徵不至焉
及徵魏桓而卜其不可行者三爲人君者聞之亦可以愧矣

春明夢餘錄 徵聘

粵稽載籍成周以鄉三物教萬民而賓興之一曰知仁聖義忠和取其德也三曰孝友睦婣任卹取
其行也三曰禮樂射御書數取其才藝也文辭弗與也兩漢取士則郡國有賢良方正之舉公卿則
得自召補掾吏州郡則得自辟用僚屬是以當時士修於家而聘召自至士孜孜於求用而人之
好德自不能舍之布列在位濟濟多賢雖至桓靈衰微而一時人才風俗之美雖成周不過是也尙
賢興行其效豈小也哉經曰正其本萬事理今貪墨日甚民生日凋療者凡以致理之未得其本也

致治以賢才爲本求才以興廉舉孝爲本經曰居家理故治可移於官傳曰求忠臣於孝子之門此探本之論也李克曰窮視其所不爲貧視其所不取此察廉之方也修之於家而壞之於天子之廷理無是也今欲扶世救民舉一諷百徵聘一事斷宜亟講也

徵聘部藝文一

祝頌

後漢黃憲

天皇封徵君以慎陽之田又以蒲輪元纁聘之徵君上表辭曰臣昧死言嚮者豺豸之勞奚補於社稷哉以天皇之明不察臣之非劣而聽左右之譽賜臣以慎陽之田寵臣以蒲輪榮臣以元纁竊以爲禮遇之過也昔者許由抗志於唐堯務光執節於殷湯二子者亦遭際聖世而蒙隆禮殊錫之光竟辭而不就以窮困其身天下不以堯湯爲棄賢也且有令名臣賢非許由智非務光而有堯湯之遇極寵錫之榮以嘉菲臣故草木落於待黃之秋而衡門之蒿獨茂塵礫沸於會風之候而寒谷之雲不飛亦以皇風之宣暢而聖情之凝鬱也臣實慙焉是以荷日月之餘輝而流汗交襟惕然而怖慄者有以也臣自揣不能從事於輔弼之列而廁於吁咈之廷矣臣願天皇聖明慎刑罰躬節儉禮

儒臣放佞人以疏骨鯁忠言之路容臣於草莽歌詠鼓琴以揚仁風擊壤以鳴聖澤此臣之所以仰祝於天皇也臣北面稽顙彌增感激待命草間無所逃遁謹上表以聞天皇深允其奏然卒不能用也

後漢書荀爽傳論

宋范蔚宗

荀爽鄭元申屠蟠俱以儒行為處士累徵並謝病不詣及董卓當朝復備禮召之蟠元竟不屈以全其高爽已黃髮矣獨至焉未十旬而取卿相意者疑其乖趣舍余竊商其情以爲出處君子之大致也平運則弘道以求志陵夷則濡跡以匡時荀公之急急自勵其濡跡乎不然何爲違貞吉而履虎尾焉觀其遜言遷都之議以救楊黃之禍及後潛圖董氏幾振國命所謂大直若屈道固逶迤也

請徵補謝朏何引表

梁武帝

夫窮則獨善達以兼濟雖出處之道其揆不同用舍惟時賢哲是蹈前新除侍中太子少傅朏前新除散騎常侍太子詹事都亭侯引羽儀世胄徽猷冠冕道業德聲康濟雅俗昔居朝列素無宦情賓客簡通公卿罕預簪紱未襪而風塵擺落且文宗儒肆互居其長清規雅裁兼擅其美並達照深識

預覩亂萌見庸質之如初知貽厥之無寄拂衣東山眇絕塵軌雖解組昌運實避昏時家膺鼎食而甘茲橡艾世襲青紫而安此懸鶉自澆風肇扇用南成俗淳流素軌餘烈頗存誰其激貪功歸有道康俗振民朝野一致雖在江海而勳同魏闕今泰運甫開賤貧爲恥况乎久蘊瑚璉暫厭承明而可得求志海隅永追松子臣負荷殊重參贊萬機實賴羣才共成棟榦思挹清源取鏡止水愚欲屈居僚首朝夕諮諏庶足以翼宣寡薄式是王庭

爲建平王聘隱逸教

江淹

府州國綱紀夫矯夏已沒大道不行雖周惠之富猶有漁潭之士漢教之隆亦見棲山之夫迹絕雲氣意負青天皆待絳螭驤首翠虬來儀是以遺風獨扇百代餘烈激厲後生斯乃王教之助古人之意焉吾稅駕舊楚憩乘汀潭挹於陵之操想漢陰之高而山川遐久流風無沫養志數人並未徵采善操將棄良用慨然宜速詳舊禮各遣纁招庶暢此幽襟以旌蓬華

搜揚懷才隱逸等勅

唐蘇頌

勅立政之本惟賢自切朕祇膺大曆殷鑒遠圖揚於王廷生此王國朕之所望久矣豈徵辟爲事未

極於巖藪而高尙絕塵見遺於草澤將何以舉逸而勸賁然來思且才之或偏器罔求備固非藏文之智則尙其言收曲逆之奇則捐其行過而能改仁遠乎哉天下諸州有懷才隱逸跡馳不調及失職寃人等並令諸道檢察使博訪具以名聞副朕饑渴之懷庶廣搜揚之義

與少室李拾遺書

韓愈

伏承天恩詔河南敦諭拾遺公朝廷之士引領東望若景星鳳凰之始見也爭先覩之爲快方今天子仁聖小大之事皆出宰相樂善言如不得聞自卽大位已來於今四年凡所施者無不得宜勤儉之聲寬大之政幽閨婦女草野小人皆飽聞而厭道之愈不通於古請問先生世非太平之運歟加又有非人力而至者年穀熟衍符貺委至若干紀之姦不戰而拘纍强梁之兇銷鑠縮栗迎風而委伏其有一事未就正自視若不成人四海之所環無一夫甲而兵者若此時也拾遺公不疾起與天下之士君子樂成而享之斯無時矣昔者孔子知不可爲而爲之不已足迹接於諸侯之國卽可爲之時自藏深山牢關而固距卽與仁義者異守矣想拾遺公冠帶就車惠然肯來舒所蓄積以補綴盛德之有闕遺利加於時名垂於將來踴躍悚企頃刻以冀又竊聞朝廷之議必起拾遺公使者往

若不許卽河南必繼以行拾遺徵君若不至必加高秩如是則辭少就多傷於廉而害於義拾遺公必不爲也善人斯進其類皆有望於拾遺公拾遺公倘不爲起使衆善人不與斯人施也由拾遺公而使天子不盡得良臣君子不盡得顯位人庶不盡被惠利其害不爲細必望審察而遠思之務使合於孔子之道幸甚

嚴陵說

無能子

光武微時與嚴陵爲布衣之交及卽位而陵方釣於富春渚光武思其舊慕其賢躬往聘之陵不從光武曰我與子交也今吾貴爲天子而子猶漁吾爲子恥之吾有官爵可以貴子金玉可以富子使子在千萬人上舉動可以移山嶽叱咤可以興雲雨榮宗華族聯公繼侯丹雘宮室雜沓車馬美衣服珍飲食擊鐘鼓合歌舞身樂于一世名傳于萬祀豈與垂餌終日汨沒無聞校其升沈榮辱哉可爲從與我也陵笑曰始吾交子之日而子修志意樂貧賤似有可取者今乃誇咤眩惑妄人也夫四海之內自古以爲至廣大也十分之中山岳江海有其半蠻夷戎狄有其三中國所有一二而已背叛侵陵征伐戰爭未嘗恬息夫中國天子之貴在十分天下一二分中征伐戰爭之內自尊者爾夫

所謂貴且尊者不過于一二分中徇喜怒專生殺而已不過於一二分中擇土木以廣宮室集繒帛珍寶以繁車服殺牛羊種百穀以美飲食列姝麗敲金石以悅視聽而已嗜慾未厭老至而死豐肌委於螻蟻腐骨淪于土壤匹夫匹婦一也天子之貴何有哉所謂貴我以官爵者吾知之矣自古帝王與公侯卿大夫之號皆聖人彊名以等差貴賤以誘愚人爾且子今之帝王之身昔之布衣之身也今人雖帝子而子自視之何異子昔蓋欲誘我以彊名而使子悅而誇咤也今又欲以彊名公侯卿大夫誘我非愚我耶夫彊名者衆人皆能爲之我苟悅此當自彊名曰公侯卿大夫可矣何煩子之彊名哉子必曰官爵者以其富貴其身也官爵實彊名也自我則有富貴之實不自我則富貴何有哉夫所謂官爵富貴者亦不過於峨冠鳴玉驅前殿後坐大廈被鮮服耳倦絲竹口飫椒蘭皆子所誘我之悅而已子所誘我者不過充欲之物而已夫車馬代勞也騏驥款段一也屋宇庇風雨也丹雘蓬茅一也衣服蔽形也綺紈韋布一也食粒却饑也椒蘭藜藿一也況吾汨乎太虛咀乎太和動靜不作陰陽同波今方自忘其姓氏自委其行止操竿投縷泛然如寄又何暇楷其肢體愁其精神貪乎彊名而充乎妄欲哉且王莽更始之有天下與子之有天下何異哉同乎求爲中國所尊者

爾豈憂天下者耶今子戰爭殺戮不知紀極盡人之性命得已之所欲仁者不忍言也而子不恥反以我漁爲恥耶光武慚于是不敢臣陵焉

徵辟不起判

得乙隱居徵辟不起子孫請以所辟官用蔭所司不許

對

失名

修身獨善寵則若驚制爵尊賢命其難廢形雖遺於軒冕蔭宜及於子孫乙貞以自居辟而不起鶴書下顧雖忘恤後之心爵命已行寧闕賞延之典若使死無用蔭生不及榮何成旌善之風宜是廢君之命場苗不食誠自絕於繫維萬藟有陰黨難虧於燕翼請優後嗣以獎外臣

對

田備

聖人出震博訪芻蕘大帝登庸詢謀師相是以周稱尙父呂望擢自磻溪殷曰得賢傳說求諸版築莫不舟梁羽翮鼎寶鹽梅表區寓之明明成朝廷之濟濟自隆周洎乎幽厲朝政在于諸侯炎漢至于哀平威權任乎卿相貂蟬耀彩雄俊遍五侯之門劍履生光賓客滿四豪之第吹竽彈劍犬吠雞

鳴用才各任所能取士不求其備弓旌之命非道德之門蒲帛之徵垂有道之室方今前凝後丞龍翰鳳翼左輔右弼岳氣星精加以徵逸璞於岩廊索遺珠於窮海丘園之下羔鴈成行閭巷之中軒輶相次元纁之禮既備巢父長謝山林瑤壁之問不空夷齊豈食薇蕨

對

前人

則天分命箕山多長往之賓濬畝劬勞滄洲有肥遁之客是以北荒孤竹甘草木而輕周南岳紫芝翫林泉而恥漢此蓋爲匹夫小節未達汾陽之旨獨行幽姿寧動少微之宿豈若大風在夢非熊入兆下箕尾而稱師委旄頭而作傳自大君有命遠頓天絃盡巖穴之英奇總濠梁之邁軸脫荷裳而襲朱紱解薜蘿而綰青綬五尺童子羞稱荷篠三事大夫恥觀瓢飲將使鄭君咎口擅不言之謠曹相府門多清淨之化方知聖人在上真隱不獲全其高淳風所偃幽真不能固其節麋卵得性麟鳳所以呈姿山林不天風雲以之通氣物既稟和而適變士亦感類而相從調飴自可怡神烹鮮足堪養性猶謂寒泉獨善未臻授手之仁薪樵兼濟有助興王之道謹對

辭諫議大夫表

五代鄭遨

臣聞君子有應敵之方因時俯仰介士有不移之操與性逍遙康堯佐舜者治道於君臣洗渭巢箕者寄形於天壤唯聖人之效業左庶物以由庚微臣學圃無成文場不調喪家室而有鰥在下悲身世而無處求生因投迹真元委心虛靜長揖當塗之客羣居在野之人幽蘭以佩於重襟灌木用成於虛室或臨窗笑傲或植杖耕耘樂在其中老而將至西山採藥已有詠歌北闕彈冠曾無夢想安期綸綍下及煙蘿夫功大者其任尊職充者其責重方今內服百工外拜五長百爾黎獻一存至公載惟清朝奚急下士誠由陛下天網地絡容無所遺夏雨春風恩無不及青陽振其沈穎旭旦起乎幽棲將令匹微罔不率俾固宜勇別環堵言隨輯車拜丹地之明廷奉卓囊之清議東山心踊其如病何賤分隱淪減思聞見九徵而往雖有語於莊周三召不行獨無求於殷浩仰祈皇鑒俯有愚衷

舉逸民

節文

宋蘇軾

國家自天聖中詔天下以經術古文爲事自是博學之君子莫不羣進於有司然所以待之之禮未盡故潔廉難合之士尙未盡出今優其禮而天下之逸民至矣且夫山嵒林谷之士雖有豪傑之才固未知有簿書史事也而剛毅訐直不識諱忌故先王置之拾遺補闕之間此其屬任之方也

請舉遺逸

鄭獬

臣伏見日者賡詔諸郡敦遣遺逸之士致之闕下者蓋二十餘人覆試祕閣皆命以官於時猥有謬舉者士論譁沸於是不復再舉今間年取進士擢第者二百人其所失者爲不少矣而士大夫不以爲怪一爲敦遣而疵謗百出蓋進士習熟之久而敦遣起於一日此論者未足以爲輕重而亦有媚疾者間之也臣欲乞復置此科而稍爲增損蓋孔子爲政必先正名漢之聘士不應召者則令敦遣就道豈有朝入科場暮爲敦遣者哉宜正其名謂之舉遺逸間歲隨科場發解後有不豫薦者開封國學及諸路舉一人又至禮部奏名後有不豫薦者許主文共舉五人並至御試時試策三兩道中第者別爲一榜命官入仕卽與正進士同如以爲歲增中第者差多卽却乞於進士數內減不合格者二十人以均之庶幾郡縣豪俊不至遺於草萊矣

辭免召命狀

朱熹

右熹準九月二十六日尙書省劄子奉聖旨朱熹召赴行在熹聞命震駭不知所爲伏念熹今年六月已蒙賜對狂妄無取被劾而歸雖蒙聖明始終臨照遷官進職曲賜寵光自揣妄庸莫勝負荷俯

仰跼蹐慙懼已深獨念凡此誤恩皆爲許其閑退故竊冒受不以爲嫌不謂皇慈未忍捐棄復加收召俾造闕庭區區臣子之心豈不深願乘此幸會再見君父庶以畢其前日未盡之餘忠顧以方竊難進易退之褻遽爾復爲彈冠結綬之計則其爲世觀笑不但往來屑屑之譏又況朝廷舉措之重亦有不宣數爲天下有識所窺者熹誠恐懼不敢冒進乞賜敷奏收還前件指揮使得卒被矜憐惠養之厚恩不至上誤訓辭褒勸之隆旨伏候指揮

與宰執劄子

前人

熹輒有愚悃敢冒公朝之聽熹昨丐祠祿休養殘疾曲荷矜從方此拜命忽爾并被堂帖又蒙聖恩收召聞命震惕無所自容顧以今夏已嘗進對尋被彈劾惶遽而歸半年之間屢叨榮寵若不自揆復此奔趨是使詔褒悉爲虛語壟斷之謂熹竊懼焉又況意廣才疎頭方命薄倘復更遭詆辱不惟愈傷士氣亦恐重爲朝廷之羞已具狀申省辭免欲乞鈞慈特賜敷奏得遂追寢實爲厚幸

辭免召命奏狀

前人

右臣輒有愚懇上瀆天威臣伏自今年六月蒙恩賜對繼叨除授寵數重疊卒畀祠祿以遂退藏感

激方深慙懼亦劇曾未踰月又蒙收召臣以屢蒙褒嘉不敢復希榮進具狀申省乞賜寢罷而陛下過恩未卽開允仍詔疾速趨赴行在臣聞命震恐不知所爲顧念前狀所陳已極詳盡未蒙聖照不敢頻煩竊自惟念昨者進對迫于疾作口陳之說有所未盡卽嘗面奏乞具封事以聞至今日久未得投進恐或以此之故再煩趣召之嚴內省稽違不勝恐懼今謹撰成奏疏一通準式實封隨狀投進伏望聖慈少賜觀覽則臣雖不獲身到闕庭亦與面對指陳無異陛下幸試察焉如其可行則采其狂妄之言而全其進退之節臣之幸也如不可用亦乞聖明哀憐其愚曲加裁赦只與寢罷元降指揮亦臣之幸也草野賤微干冒鈇鉞下情無任危懼戰栗之至謹錄奏聞伏候勅旨

申省狀

前人

右熹昨嘗具狀申乞敷奏寢罷召赴行在指揮今準尙書省劄子奉聖旨不許辭免疾速赴行在者熹聞命震恐不能自勝伏念臣之事君猶子事父東西南北唯命之從此古今不易之理也矧熹至愚遭遇明聖不忍終棄曲賜甄收私義未安不免辭避未蒙開允猶復有言揆以常情實乖臣子之禮然熹之愚悃前狀敷述已極詳明今更不敢喋喋以煩公聽惟是今年六月蒙恩賜對時以迫於

疾作口陳之說不獲究盡卽嘗面奏乞具封事以聞至今日久未得投進恐或以此之故再煩收召之嚴內省稽違不勝恐懼謹已繕寫準式實封遣人齎擎詣闕通進若使狂妄之言得塵聖覽卽熹雖不獲身到闕庭亦與面對口陳無異必蒙聖慈許其辭免以全進退之節除已具狀奏聞外謹具狀申尙書省伏乞更賜敷奏寢罷元降指揮伏候鈞旨

與宰執劄子

前人

熹昨具狀劄懇辭召命慈被恩旨未賜俞允熹之微誠已具前牘不敢重陳以煩公聽今謹撰到奏疏一通準式實封具狀繳進及別具狀略述鄙誠恭叩廟堂乞賜敷奏欲望鈞慈照察早垂矜念使得遂其所請不致久稽宸命以乖臣子之恭則熹不勝幸甚干冒威尊伏增震悚

申登聞檢院狀

前人

右熹昨于今年六月蒙恩賜對偶以足疾發作更有口陳事理未得殫盡嘗卽面奏乞許續具封事以聞至今日久未獲投進茲者又蒙聖恩輒敢撰到奏疏一通準式實封遣人齎擎詣闕投進并述愚誠懇辭恩命謹具狀申行在登聞檢院欲望依法施行謹狀

奏舉遺逸趙蕃狀

真德秀

臣等伏讀嘉定八年九月辛未明堂大禮赦書內一項士人有節行才識學術素爲鄉里推重不求聞達者委監司帥臣同加搜訪每路一二人仍與本州長吏具從來所爲事實所通學術連銜結狀保明聞奏卽不以常才備數委三省再加察訪如所舉不妄特與擢用仰見聖朝網羅遺逸之意臣等朝夕博訪期所以稱塞明詔之萬一竊見文林郎監潭州南嶽廟趙蕃元祐故家學有源委識慮深遠節操清高蚤歲得官臨事有立年踰四十卽上詞請隱居求志垂三十載矣安貧處約澹然無營少工于詩晚益平澹身雖閒退而愛君憂國之念未嘗少忘其在州里誘掖後進一以孝弟忠信爲本蕃雖名在吏部然其行誼學識素爲鄉曲所推不求聞達正應詔旨臣等旣深知其爲人又其家居適在所部庸敢輒以名聞伏望朝廷更加察訪如臣等所舉不妄卽乞特加旌擢以勵士俗其於世教蓋非小補

舉布衣胡大壯狀

衛涇

檢準嘉定五年近降指揮方今收用人才非止一途然山林畎畝之間懷德抱道不求聞達者豈無